## LA USC DI LADINS - VENERDI' 10 MARZO 2023

## Scomenz »col bot« per i 90 egn de la Musega de Poza

N beliscim conzert de la Banda Sinfonica di Joegn del Trentin à avert i festejamenc per l cedean de la Musega de Poza, che i jirà inant fora per dut l an con na lingia de evenc



I joegn sonadores de la Banda Sinfonica di Joegn del Trentin con la maestra Chiara Vidoni.









I intervenc di raprejentanc de la Musega de Poza e del ombolt de Sèn Jan

L era na sera del 1933 e n grop de sonadores da Poza, che i fajea pèrt de la Musega de Vich, i vegnia ju per Col da Pra, de retorn da proes de banda. Anter na ciacola e l'autra, chisc ot sonadores i se à dit che i aessa podù se sparagnèr de jir ogne outa inant e endò a pe, se ence Poza aessa podù aer sia Musega.

Coscita, da chel che i conta, l é

Coscita, da chel che i conta, l é nasciù la Musega de Poza, se destacan da chela de Vich.

A la dir duta, fazile na Musega a Poza la era ben nasciuda ence dant da la gran vera, P. Frumenzio aessa troà fora vèlch document de la fin del 1800, e da chel che disc la Federazion de la Bandes del Trentin avisa la pruma Banda a Poza era nasciuda del 1893. Sun chest se podessa amò enrescir, ampò de segur chel prum tentatif no à abù regnèda e la storia ofizièla de la Musega de Poza de anchecondi pea via donca jai 90 egn.

Ence del 1933 no l é stat sorì, ma la gaissa de «chi ot« la era grana e i se à fat en cater per jir a troèr strumenc de seconda man, ajache scioldi no n era. Pio Florian de Ciout, che l aea emparà a sonèr da joen col melitare e l saea de musega, l é doventà l Maester de chel grop che de fata l é cresciù e, anter auc e basc, l é jit inant enscin anchecondi zenza perder la gaissa, che alincontra la é semper maora. Anchecondi chesta Musega con sie president Matthias Pezzei 'Pencio', l maester Giancarlo Dorich 'Cavei', l diretif e i sonadores, rué al bel numer de 60 componenc, no la se à segur desmentià de chest bel cedean. Defat l'à jà pissà a na lingia de apuntamenc fora per dut chest an per fèr festa con si amisc, con chi che te chisc egn i à colaborà con ic e con duta la comunanza.

## N conzert da marevea con la BSGT

L prum apuntament de chest an de festa l é stat endrezà ai 5 de mé te tendon de Poza.

De gra al sostegn de Adriano Winterle, sonador de la Musega de Poza e ades raprejentant de la Museghes de Fascia e Fiem te la Federazion de la Bandes del Trentin, lé ruà per la pruma outa te Fascia la Banda Sinfonica Giovanile del Trentino (BSGT) che en domenia, per festejèr i 90 egn de la Musega de Poza, à portà dant n bel conzert sul tem de «Storie, miti e leggende».

I 60 componenc de la BSGT, de età anter i 15 e i 30 egn, é stac sele zioné l uton passà da la Federazion anter i miores sonadores de Bandes, Scoles de Musega e Conservatories del Trentin e i à portà inant na formazion con proes e week end de full immersion con la maestra Chiara Vidoni, per ruèr a chest conzert. L repertorie sugestif e articolà portà dant tel conzert é jit da la Florentiner March de Julius Fucik con aran-giament de Frederick Fennell, a la beliscima sonèdes per banda de Gulliver's Travel de Bert Appermont, a la composizion de Federico Agnello dedichèda a la isola misteriousa de Avalon e amò, per restèr tel mond de la lejendes, la sinfonia de Johan de Meij The Lord of the Ringse con arangiament de Paul Lavender, la composizion de Steven Reineke The witch and the Saints che anter sacher e profan pescia enscinamai ti Carmina Burana, per fenir con la colona sonora del film «The Chro-nicles of Narnia» de Harry Gregson Williams col arangiament per banda de Paul Murtha e col bis »Over the rainbow« da The wizard of Oz.

Toc no sorii, ma porté dant con gran braura e intonazion perfeta dai joegn sonadores vidé da la maestra Chiara Vidoni, te na esccuzion che à soscedà gregn batiman del publich e i complimenc da man de duc i intervegnui, chiamé sun paladina tel intermez da la brava prejentadora Francesca Bertoletti.

## Endò su le Torn per I cedean

La presidenta de la Federazion Cristina Moser à rejonà en curt del percors de formazion de la BSGT e ai joegn sonadores e a la Maestra, che la é furlana e l'à dit de aer entenù ence la paroles per ladin, l é ruà la lauda dal ombolt de Sèn Ian Giulio Florian, dal master Giancarlo Dorich, dal raprejentant Adriano Winterle e da Matthias Pezzei. L President de la Musega de Poza à recordà en curt la storia e en particolèr l maester Paolin Cincelli 'Zeli' e l à anunzià che te chest cedean ogne meis sarà na scomenzadiva: de oril vegn metù a jir co la Scola de Musega »Il Pentagramma« n projet te la scoles per arvejinèr i bec a chest mond maraveous, dapò de mé l tradizional Conzert d'Aisciuda vedarà adum sun paladina la doi formazions de Vich e Poza, per recordèr che jai 90 egn dut é nasciù da la Musega più veia de Fascia e de messèl ruarà la Banda de

l'Euregio.

De setember la Musega de Poza farà endò la 'gran sproèda' fata del 2003: Jir coi strumenc fin sunsom la Torns del Vaiolet e fèr rendenir l son de la notes da chel lech maraveous e en ultima al scomenz de otober sarà la gran festa. L conzert se à serà su con na bela viva sonèda dai joegn museganc, che à ori dalbon scol bots i festejament per i 90 egn de la Musega de Poza.

Lucia Gross